

## Furaha Mwenye Dhambi Mmoja Anapotubu

*Nawaambia, Viwyo hivyo kutakuwa na furaha mbinguni kwa ajili ya mwenye dhambi mmoja atubuye, kuliko kwa ajili ya wenye haki tisini na kenda ambao hawana haja ya kutubu.—Luka 15:7.*

**Y**esu, Mwana wa Aliye Juu Zaidi, anashindana na nguvu za Shetani, ambaye anaweka kila mbinu iwezekanayo ambayo kwayo anaweza kuzuia kazi ya Mungu. Kitu cha thamani ambacho nguvu za nuru na za giza zinashindania ni nafsi ya mwanadamu. Mchungaji Mwema anatafuta kondoo Wake, na Anastahimili kujikana nafsi, taabu na ufukara. Wachungaji wanajua kitu fulani kuhusiana na pambano hilo kali, lakini wanajua kidogo sana ukilinganisha na yale ambayo Mchungaji wa kondoo anayavumilia. Anawatafuta wale waliopotea kwa huruma, kwa huzuni, na kwa kung'ang'ana. Hatimaye Mchungaji anapompata kondoo Wake aliyepotea, Anamkumbatia mikononi Mwake kwa furaha, na kumchukua mabegani Mwake ili kumrejesha zizini. Na kisha vinubi vya mbinguni vinaguswa, na wimbo wa shangwe unaimbwa juu ya fidia iliyotolewa kwa kondoo aliyetanga na kupotea. “Kutakuwa na furaha mbinguni kwa ajili ya mwenye dhambi mmoja atubuye, kuliko kwa ajili ya wenye haki tisini na kenda ambao hawana haja ya kutubu.” ...

Mwana wa Adamu alikuja kutafuta na kuokoa kile kilichopotea. Kondoo aliyepotea kamwe hawezi kurejea zizini mwenyewe. Ikiwa hatatafutwa na kuokolewa na mchungaji mwangalifu, anazurura mpaka pale anapoangamia. Huu ni uwasilishaji wa jinsi gani wa Mwokozi! Isingekuwa Yesu, Mchungaji Mwema, kuja kutafuta na kuokoa kile kilichopotea, tungekuwa tumeangamia. Mafarisayo walikuwa wamefundisha kwamba ni taifa la Kiyahudi tu litakalookolewa, na waliwatendea mataifa mengine kwa dharau. Lakini Yesu alivuta usikivu wa wale ambao Mafarisayo waliwapuuza, na aliwatendea kwa kujali na kwa uungwana....

“Kwa maana jinsi hii Mungu aliupenda ulimwengu, hata akamtoa Mwanawe pekee, ili kila mtu amwaminiye asipotee, bali awe na uzima wa milele.” Upendo huu kwa niaba ya mwanadamu, ulioneshwa katika zawadi ya Mwanawe Pekee, na hivyo kumfanya Shetani kujawa na chuki kali, kwa Mtoaji na kwa Zawadi ya thamani mno. Shetani alikuwa amemwasilisha vibaya Baba kwa ulimwengu katika nuru ya uongo, na kwa Zawadi hii kuu uwasilishaji wake ulidhihirishwa kuwa wa uongo, kwa maana hapa kulikuwa na upendo usio na kifani, akithibitisha kwamba mwanadamu alipaswa kukombolewa kwa gharama isiyoweza kufikirika. Shetani alikuwa amejaribu kuharibu sura ya Mungu ndani ya mwanadamu ili kwamba Mungu alipomtazama katika nyongwe wake, katika ukaidi wake, katika kudhalilishwa kwake, Aweze kushawishika kumtoa kama aliyepotea bila tumaini. Lakini Bwana alimtoa Mwanawe wa pekee ili kwamba yule mwenye dhambi zaidi, aliyeshuka hadhi zaidi, asipotee, bali, kwa kumwamini Yesu Kristo, apate kurejeshwa upya, kuzaliwa upya, na kurejeshwa katika sura ya Mungu, na hivyo kuwa na uzima wa milele

(The Signs of the Times, Novemba 20, 1893).